



*Vaquí lo primièr numerò del corrièn de l'Escòla Occitana d'Estiu !
Es demorat mai de nòu meses dins lo ventre de l'associacion. Esperam qu'aurà
de pichons fraires dins los meses que venon. Aqueste corrièn se vòl un ligam
entre l'associacion e los aderents. Prepausarem de novèlas sus las accions
passadas e que vendràn.*

*Dins aqueste numerò 1, poiretz legir d'informacions sus l'Escòla d'Estiu que
ven, los eveniments passats e a venir de l'associacion, e tanben una cronica
musicala.*

Bona lectura !

La Colà Comunicacion

L'EOE se sarra...

La 49e Escòla Occitana d'Estiu se debanarà a Vilanuèva d'Òut (47), del 13 al 19 d'agost 2023. Serà l'escasença d'aprene, de viure e de partèjar en occitan : corses, talhièrs, concerts, balètis, conferéncias...

Per una setmana immersiva interdialectala, adaptada pels pichons, joves e pels adultes, vos podètz marcar abans lo 27 de julhet : mai d'entresenhas suls corses e las tarifas aici :

<https://eoe-oc.org/language/oc/activitats/47e-eoe-agost-2021>

Contact : eoe@wanadoo.fr

A la davalada, encara mai d'escambis !

La segonda edicion daus escambis occitans de la davalada (EOD) se debanèt dau 2 au 4 de novembre dau 2022. Fuguet un moment riche d'eschamnes e de creacions amb de novèlas chançons (que podrem cantar a l'estanquet), e de caligrafias e serigrafias. La tresesma edicion se debanarà dau 2 au 4 de novembre 2023, totjorn a Colonha, Gers. Las entresenhas, lo formulari d'inscripcion, tant coma d'exemples de produccions de las edicions passadas sus lo site de l'EOE : <https://eoe-oc.org/language/oc/activitats/escambis-occitans>.

Autres eveniments [passats e a venir]

La Quinzena Occitana 2023 se debanarà del 5 al 22 d'octobre en Òut e Garòna. Aquesta edicion serà sus la tematica "Femnas d'Òc". Son inauguracion se tendrà, plaça Jansemin a Agen, lo 5 d'octobre de sèr. Mai d'entresenhas sul programma de trapar aici :


<https://quinzenaoccitana.monsite-orange.fr/page-627bc8a688925.html>

Rondes e danças redondas

La librariá de l'EOE n'es pas sonque un loec onte se pòden 'chaptar de libres sus e en occitan. I a tanben de discs e de films de prepausats. Per l'EOE 2022, ai reüssit a me limitar a dos discs nòus (e un libre, e un film...) : lo disc de Licotissa (duo de musica tradicionala que a acompanhat las EOE's precedentas), e un disc, editat per lo label Pagans, e preparat per l'associacion La Granja (Carcin), titolat « Rondes, Danças Redondas ». La particularitat d'aqueu disc es que se concentra sus una mena de chançons : las rondas. N'i a 25 e son en francés, en occitan o en francitan (e una traducha en breton tanben) amb la participacion d'esquasi 50 musicaires. Totas venan de collectages, la majoritat daus collectages de l'abat Lacoste, mas trobem tanben un collectage de Canteloube e un de Pèire Boissiera. Per los dançaires, fau tanben precisar que la majoritat de las chançons se pòdon dançar, mas que d'unas son de interpretacions tròp originalas per las dançar. Quò es un disc plan interessant per descobrir aquest patrimòni de chançons. Una capitada, coma sovent amb los discs dau label Pagans.

Ai pas parlat dau disc de Licotissa aquí, mas los qu'eran a l'EOE en 2019, 2020, e 2021 coneissen plan la musica d'Anne-Lise e Matilda e an polgut l'apreciar pendent los baletis.

Alexandra



Dimenjada dels amics de l'EOE del 17 al 19 de febrèr de 2023, a Girona : visca l'amistat occitano-catalana !

Las doas primièras dimenjadas dels amics de l'EOE se debanèron a Tolosa : aisit, aviam la Topina e l'Ostal d'Occitania per nos remosar, de mond de la còla occitana i demoravan o èran pròches. Los nòstres amics catalans faguèron lo

viatge per nos i retrobar, visitar la vila, jugar, cantar e dançar aprèp d'amassadas a l'entorn de las activitats de l'EOE.

Alavetz, la còla de l'EOE decidiguèt de se raprochar de Catalonha e organizèt la tresena dimenjada [en 2022] al Clapàs. Aisit, la Maud i demòra, l'Aliça e lo Vincenç tanben, e Lo Barricade, luòc associatiu dels bèls nos aculhiguèt per de seradas e de charradissas que l'EOE es costumiera. Los catalans se mostrèron totjorn presents, e encara mai qu'abans : pendent la dimenjada, de segur, amb una visita en catalan pel Josep, mas tanben dins l'organizacion de las activitats de l'EOE seguenta : lo talhièr abitual de catalan de Meritxell, mas tanben de novèls amb las danças dels bastons de la Laura e lo talhièr d'audiovisual del Fede.

La quatrena dimenjada [2023], coma una evidéncia per totes, se deviá far en Catalonha ! Mens aisit... Mas la Laura, la nòstra catalana dançaira de bastons, prenguèt lenga amb lo Marc de l'Atenèu Salvadora Catá de Girona e una aventura novèla e emplenada de riquesas e d'encontres nos i esperèt.

Foguèrem un quarantenat d'amics de l'EOE entre lo divendres e lo dimenge, a nos reünir dins aquela vila magnifica que visitèrem mercés al nòstre guidaire catalan e amic de l'EOE, lo Fede, e Marius, cosinièr e engatjat de l'Atenèu.

Pau de l'Atenèu nos faguèt visitar lo musèu del cinèma de Girona ont trabalha : una meravilha !

Aquela quatrena dimenjada dels amics de l'EOE foguèt l'escasença d'encontres novèls, d'unes extraordinaris, d'autres emplenats d'emocions, e nos permetrà un còp mai, de far parlar de la nòstra associacion, de las nòstras lenga e cultura occitanas, ligadas pel còr a sas bessonas catalanas. De segur sortiguèrem de la dimenjada fatigats de tan marchar e dançar, mas lo còr plen de vam e d'envejas de ligar las aventuras de l'EOE a las de l'Atenèu, a las de la corala feminista, e, un sòmi, d'anar mai luènh ducas a las valadas occitanas d'Itàlia !

Call to action

Escola Occitana d'Estiu

16 rue de Pujols, 47300, villeneuve

This email was sent to {{contact.EMAIL}}

You've received this email because you've subscribed to our newsletter.

[Se désinscrire](#)

